

# **Сўзлари Қуръон оятларидан иборат бўлган аёл**

05:00 / 11.03.2017 3205

Абдуллоҳ ибн Муборак айтадилар: “Аллоҳнинг уйини ҳаж қилиш ва Расууллоҳ соллаллоҳу алайҳи васалламнинг қабрларини зиёрат қилиш мақсадида сафарга чиқдим. Бир жойда йўлда кетаётсам бир аёлга дуч келиб қолдим. У бошига юнгдан тўқилган рўмол ёпиниб олган эди. Мен:

“Ассалому алайкум ва роҳматуллоҳи ва барокатух” дедим.

“(Уларга) раҳмли Парвардигор (томони)дан салом (айтилур)” деди.

“Аллоҳ сенга раҳм қилсин. Бу ерда нима қиляпсан?” деб сўрадим.

“Кимни Аллоҳ адаштирган бўлса, уни тўғри йўлга солиб қўювчи (одам) йўқдир” деди. Унинг йўлдан адашиб қолганини сездим ва “Қаерга бормоқчисан?” деб сўрадим.

“(Ўз) бандаси (Муҳаммад)ни, унга мўъжизаларимиздан кўрсатиш учун (Маккадаги) Масжиди Ҳаромдан (Қудсдаги) Биз атрофини баракотли қилган Масжиди Ақсога тунда сайр қилдирган зотга тасбеҳ айтилур” деди. Мен унинг ҳажни тамомлаб, Байтул Мақдисга кетаётганини пайқадим.

“Бу ерда қанчадан бери турибсан?” деб сўрадим.

“Соғ бўла туриб, уч кеча (ва кундуз)” деди.

“Ейдиган овқатингни кўрмаяпман. Нима билан таомланяпсан?” деб сўрадим.

“Унинг Ўзигина мени едирур ва ичирур” деди.

“Хозир Рамазон ойи эмас-ку” дедим.

“Ўз ихтиёри билан бирор хайрли иш (нафл ҳаж ёки умра) қилса, албатта, Аллоҳ шукрни қабул этувчи, доно зотдир” деди.

“Бизга сафарда оғзимизни очишга руҳсат берилган-ку” дедим.

“Агар билсангиз, рўза тутишингиз (фидя бериб тутмаганингиздан) яхшироқдир” деди.

“Таҳорат қилишга сувинг борми?” дедим.

“(Ғусл қилишга) сув топа олмасангиз, покиза ер (тупроқ, тош, қум, чанг кабилар) билан таяммум қилиб, юзларингиз ва қўлларингизга суртинг” деди.

“Нега менга ўхшаб гапирмаяпсан?” деб сўрадим.

“У бирор сўзни талаффуз қилса, албатта, унинг олдида ҳозиру нозир бўлган бир кузатувчи (сўзни ёзиб оловчни фаришта) бордир” деди.

“Сен қайси қабила вакилисан?” деб сўрадим.

“(Эй, инсон!) Ўзинг (аниқ) билмаган нарсага эргашма! Чунки қулоқ, кўз, дилнинг ҳар бири тўғрисида (ҳар бир инсон) масъул бўлур (жавоб берур)” деди.

“Хато қилдим. Мени кечир” дедим.

“Бу кун сизларга нисбатан айблов йўқ. Аллоҳ сизларни мағфират қилгай” деди.

“Сени мана бу туямга миндириб, карвонингни топишингга ёрдам берсам майлими?” дедим.

“Ҳар қандай яхши (савобли) иш қилсангиз, албатта, уни Аллоҳ билур” деди. Туямни чўктирдим. Шунда у:

“(Эй, Мухаммад!) Мўминларга айтинг, кўзларини (номаҳрам аёллардан) қуий тутсинлар” деди. Мен кўзимни пастга қаратдим ва “Туяга мин” дедим. Энди минмоқчи бўлганида туя қочиб кетди ва у аёлнинг кийими йиртилди. Шунда у:

“(Эй, инсонлар!) Сизларга не мусибат етса, бас, ўз қўлларингиз қилган нарса (гуноҳ) сабаблидир” деди.

“Туяни тутиб келгунимча сабр қилиб тур” дедим.

“Бас, Биз уни Сулаймонга англатдик” деди. Мен туяни тутиб келтирдим ва унга: “Туяга мин” дедим. У туяга мингач:

“Бизларга бу (улов)ни бўйсундириб қўйган зотга тасбеҳ айтамиз. Бизлар ўзимиз бунга қодир эмас эдик. Албатта, бизлар (барчамиз) Раббимиз (хузури)га қайтувчи дидирмиз” деди. Туянинг арқонидан тутиб, тез-тез юриб, қичқириб кетдим. Шунда у:

“(Юрганингда) ўртаҳол юргин ва овозингни паст қилгин!” деди. Шунда мен аста-секин юрдим ва шеърни куйга солиб, ҳиргойи қилиб кетдим. Ҳалиги аёл:

“Қуръондан (ўзингизга) осон бўлган даражада ўқийверингиз!” деди.

“Менга кўп яхшиликлар берилган” дедим.

“Бундан фақат оқил кишиларгина эслатма олурлар” деди.

“Эринг борми?” деб сўрадим.

“Эй, имон келтирганлар! Сизларга (жавоби) аён қилинса, сизларга хуш келмайдиган нарсалар ҳақида (савол) сўрамангиз!” деди. Кейин унга то карвонга етгунимизча бошқа гапирмадим. Карвонга етганимизда унга:

“Мана карвон. Унда сенинг кимларинг бор?” деб сўрадим. У:

“Мол-мулк, фарзандлар дунё хаётининг зийнатидир” деди. Карвонда фарзандлари борлигини билдим.

“Улар ҳажда нима иш қилишади?” деб сўрадим. У:

“(Йўлларга) белгилар ҳам (қўйди). Юлдузлар билан ҳам улар йўл топурлар” деди. Билдимки, улар йўл кўрсатувчи сифатида келишган экан.

“Ўғилларингни исмлари нима?” деб сўрадим.

“Ваҳоланки, Аллоҳ Иброҳимни (Ўзига) дўст тутгандир”, “Аллоҳ Мусо билан (бевосита) гаплашди”, “(Биз унга): “Эй, Яҳё! Китобни (яъни Тавротни) жиддийлик билан қўлга ол!” – (дедик)” деди. Мен:

“Эй Иброҳим!”, “Эй Мусо!”, “Эй Яҳё!” деб уларни чақирдим. Дарров улар мен томонга келишди. Келиб ўтиришгач, онаси уларга:

“Энди бирортангизни шу пулингиз билан шаҳарга жўнатингиз, у энг покроқ таомларни қараб, сизларга ундан озуқа олиб келсин” деди. Ўғилларидан бири бориб, таом сотиб олиб келди ва менинг олдимга қўйди. Онаси менга:

“(Жаннат аҳлига): “Ўтган кунларда (дунёда) қилиб ўтган (эзгу) амалларингиз сабабли (ушбу ноз-неъматларни) ёқимли иштаҳа билан еб-ичаверингиз!” (дайилур)” деди. Мен ўғилларига:

“Менга онангиз ҳақида гапириб беринглар” дедим. Шунда улар:

“Онамиз 40 йилдан бери фақат Қуръон оятлари орқали гапирадилар. Бундай қилишларига сабаб гапиргандан хато қилишдан ва тойилишдан қўрққанлари учундир. Истаган нарсасига қодир Зот покдир” дейишди. Шунда мен:

“Бу Аллоҳнинг фазлидирки, уни Ўзи хоҳлаган (бандалари)га берур. Аллоҳ (карами) кенг, доно зотдир” дедим.

Ҳоний Ҳожининг “Солиҳлар ҳаётидан минг бир қисса”

китобидан Нозимжон Ҳошимжон таржимаси